

清代七百名人物傳



蔡冠洛 编著

清代七百名人傳

下
册

北京市中国书店

第二二編實業 水利

于成龍

于成龍字振甲。漢軍鑲黃旗人。康熙七年。由廩生授直隸樂亭知縣。八年。署灤州知州。以罪囚脫逃。降調樂亭。民列其善政。叩閭籲留。部議保留。疊經飭禁械爲首者繫獄。九年二月。縣民再叩閭。下巡撫金世德察奏。所列善政皆實。復縣任。十三年六月。以緝盜逾限未全獲。應降調。金世德奏言。樂亭舊號疲邑。成龍撫綏調劑。與民相宜。可否留任。部議不准。得旨于成龍撫綏疲邑。與民相宜。其留任。十八年。擢通州知州。二十一年。直隸巡撫于成龍遷兩江總督。疏薦其可大用。尋又請敕廷臣。推清操久著與相類者。爲江寧知府。上卽擢成龍任之。二十二年三月。擢直隸巡撫。頒行賜銀千兩。表裏二十端。諭詢畿輔重地。利弊應興革者宜何先。成龍奏弭盜爲先。奸盜之徒。倚仗旗下名色。窩藏匪類。有司明知而莫敢深究。嗣後有如此者。臣當執法治之。旣抵任。疏言。弭惡之方。在力行保甲。今民間已申飭遵行。惟旗下莊屯。向不屬州縣管轄。本旗統領官。遠在京城。僅有撥什庫在屯。未能約束。今應令旗人與民戶同編保甲。以撥什庫與鄉長互相稽察。無論盜所劫之家。是旗是民。俱協力救護。能擒獲者賞給。如窩盜縱盜。許州縣官詰訊申報。又疏言。燕山六衛。所轄遼闊。與州縣不相統屬。遇有賊盜。止責汛弁緝拿。而衛員漠不關心。此賊盜所以充斥也。請嗣後以衛地近州者歸州。近縣者歸縣。則保甲易編。匪類易察。京東之通州。西之盧溝橋。南之黃村。北之沙河。宜設捕盜同知四員。分駐其地。自守備以下。分汛各官。徵巡墩臺諸務。及旗下莊屯。悉歸稽察。則武弁有所顧忌。旗人亦受約束矣。疏並下部議行。先後察究武清易州等處。怙惡不悛之旗人。請旨實諸法。又疏言。順德廣平大名等府。額解狐皮花絨芝蔴運送費多。恐借端苛派。請改解折色。又言河工歲修派夫。應令旗地與民地一體計畝均役。下部議。格於例。並得旨如所請行。二十六年四月。上以于成龍廉能稱

職。誠心愛民。特旨嘉獎。加太子少保。十月。巡行畿甸。賜鞍馬並銀千兩。十二月。詔同山西巡撫馬齊往鞫湖廣巡撫張汧貪款得實。論罪如律。初。成龍任安徽按察使。靳輔爲河道總督。大治淮黃隄壩。上以其未能兼顧下河。敕成龍督理之。遇事得自陳奏。成龍請濬海口故道。靳輔請於下河築長隄。束水注海。上詔詢籍隸淮揚諸臣。奏宜從成龍請。工部尙書薩穆哈奉命往問居民。還奏百姓僉謂濬海口無益。大學士九卿議未決。成龍遷巡撫。以侍郎孫在豐督理下河。靳輔奏開中河以便漕運。又請於高家堰外增築重隄。束水北出清口。則下河不濬自治。上以疏示成龍。成龍奏下河宜濬。重隄不宜築。開中河無益。反爲民累。上允靳輔開中河。遣尙部佛倫侍郎熊一瀟同總督董訥總漕慕天顏會勘增築重隄事。佛倫等還奏。宜從靳輔請。慕天顏孫在豐御史郭秀相繼劾靳輔。與屯累民。靳輔亦劾慕天顏。孫在豐附和成龍。朋謀阻撓。至是成龍自湖廣還。詔同靳輔入對。靳輔言開濬海口。有海水倒灌之患。成龍奏若築高家堰重隄。縱上流之水不來。而秋霖暴漲。天長六合等處之水。洩歸何處。故海口仍應開濬。上罷靳輔任。以福建總督王新命代之。別遣部臣代孫在豐。五月。學士開音布侍衛馬武閱中河。還奏商賈舟行不絕。漕運可通。又劾慕天顏前此禁止堵塞支河。勒令已進中河漕運退回。有意阻撓。命逮慕天顏鞫。得成龍寄書。令勿順從靳輔狀。議削成龍太子少保。降二級調用。得旨留巡撫任。二十九年。內陞左都御史。兼鑲紅旗漢軍都統。三十一年二月。王新命爲山東巡撫。佛倫劾罷。靳輔仍復任。十二月。靳輔卒。成龍任河道總督。三十三年正月。奉詔至京。疏言。運河自通州天津至山東嶧縣。卑薄各隄。宜加築高厚。武清八百戶等處。宜增建月隄。黃河自榮澤縣至江南碭山縣。卑薄各隄。均宜加築。高堰六壩周橋大壩永安西隄。均宜改建石工。其毛城鋪等處舊有引河。宜疏濬深通。檀度寺東隄及茆家園等處挑挖引河。卽以所挖之土。築增兩岸東水子隄。徐州城石岸。急應大修。清江浦迤下至黃浦東西兩隄。揚州屬江都東隄。高郵西隄。俱需加築。並修葺閘壩涵洞。又疏言。河防各設專員。並無顧此失彼之虞。天津道有地方職掌。應增設兩道。一駐河西務。一駐倉州。分督北自通州南至德州河務。江南河工錢糧。向分廳庫收支。不屬淮徐淮揚兩道職掌。應增設河庫道。桃源同知現駐南岸。應

增北岸同知一。邵睢同知宿虹同知現皆駐北岸。應增南岸通判各一。山陽清河舊設同知一。應增一員。分管兩縣。毛城鋪開壩緊要。徐屬同知。難以兼顧。應增通判一。駐碭山縣。七月。疏言。洪澤一湖。密近淮城。爲淮睢二水所匯。歸伏秋水發。波濤澎湃。僅恃高堰土隄。雖加築堅固。仍須歲修搶修。急宜改建石工。所有六壩及自小黃莊起至古溝東涵洞止。共估工料銀五十萬兩有奇。疏下部議。從之。上親征噶爾丹。成龍以左都御史銜同侍郎李綱左通政喀拜督運軍糧。三十六年。以功加四級。復予騎都尉世職。三十七年二月。命以總督銜管直隸巡撫事。三月。興修永清固安至張協七十里舊隄。挑濬渾河淤沙。十旬竣工。詔錫名永定河。建廟以祀。奏設南北岸兩分司一。以重責成。視黃運兩河之例。敕部擇諳練河務之候補候選人員赴工效用。董安國以不諳河務罷任。仍授成龍河道總督。三十八年三月。上巡閱高家堰歸仁隄等處。以增築疏濬事宜。諭令籌辦。五月。疏言。黃運兩河。舊派徐州屬邑民夫六千九百餘名助河兵供役。率以老弱充數。且多逃曠。請按派夫舊額。改令每名徵銀五兩。爲添設河兵月糧。又疏言。皇上親視河工。指授方略。大爲修治。臣以需帑浩繁。請許急公人員捐修。蒙諭如果修築堅固。疏濬深通。告成之日。自有議敘。仰見聖心寸功必酬。現在應修之處不一。若不酌定成例。恐効力人員觀望不前。謹條列計丈議敘各款。疏並下九卿議行。九月。以疾乞假。命在任調理。三十九年三月卒。謚曰襄勤。子永世襲騎都尉。雍正八年。以成龍入祀賢良祠。

張玉書

張玉書。字素存。江南丹徒人。父九徵。順治九年進士。官至河南提學僉事。玉書以順治十八年進士。改庶吉士。康熙三年。授翰林院編修。十五年。擢國子監司業。旋轉侍講。歷左右庶子。充日講起居注官。十九年五月。以進講稱旨。敕部議敘。加詹事府詹事銜。加一級。六月。陞侍講學士。二十年。擢內閣學士。充經筵講官。二十一年十月。教習庶吉士。二十二年十二月。遷禮部侍郎。兼翰林院掌院學士。二十三年。丁父憂。二十六年。服闋。特陞刑部尙書。二

十七年五月。開音布監督高郵州石工。奏請閉塞支河口。爲中河蓄水。聖祖命玉書偕圖納前往勘視。並遍閱毛城鋪高家堰以及海口諸處情形。詳加審度。具奏。欽行。上謂玉書曰。此行是非可否。當秉公陳奏。不可效熊一瀾託故推諉也。玉書叩頭領訓。先是開音布奏參高郵州河員。擅開減水三壩。請議處。比玉書至。卽馳奏河員開壩。乃循舊例。應開無罪。開音布不加詳核。遽行瀆奏。請議處。八月。還京。疏言。奉命勘閱河形。黃河西岸出水頗高。年來大水未曾溢岸。則河身淤塞之說非也。海口岸寬二三里。河流飛迅入海。絕無阻滯。諸減水壩。應如舊閉塞。其現在挑濬各工。勞而無益。應請停止。惟是中河一道。利濟舟楫。得此免涉黃河百八十里之險。殊關緊要。但形勢逼近黃河。既不可挑寬。而太狹又不能容納運河及駱馬湖之水。臣勘蕭家渡楊家莊新莊口。有衝決舊河之處。請飭河臣增建減水壩。相時宣洩。則中河舟楫。可以長通。惟於中河淺窄之處。酌量挑濬。支河口應如開音布所奏。永行閉塞。奏入。上均如所議。是年十二月。特旨差玉書往浙江按理事件。是月。調禮部尙書。二十八年二月。上南巡。駐蹕蘇州府。玉書自浙江還。復命杭州將軍郭丕奏民人杜光遇控於撫臣金鉞。陳兵丁擾民十款。有百姓生則倒懸。死無安土之語。金鉞行藩司李之粹查訊之。粹遽咨臣。請出示禁。理合據實陳奏。玉書奉敕確查。至是復奏云。遍查並無杜光遇其人。實由撫臣金鉞捏造虛款。暨藩司李之粹迎合附會。情罪非輕。應按律問罪。二十九年。授文華殿大學士兼戶部尙書。三十年冬。命閱河工。與圖納偕行。三十一年正月。還。繪圖以進。時河臣靳輔。請於高家堰增築小隄。上問玉書高家堰水勢如何。另築小隄。果有益否。玉書奏云。曩者黃漲時。淮流被逼。故洪澤湖水。視昔爲高。今擬築小隄之處。去高家堰不遠。河湖水漲。卽高家堰之大隄。且不可保。豈小隄之可衛。築之無益。不如其已。上問宿遷一帶民生若何。玉書奏。小民沐聖主憂勤。甚爲得所。上欣悅。玉書又疏高家堰一帶河工。惟史家刮至周橋最爲衝要。不急於此。處處重設。隄防雖多。築隄數重無益也。臣度史家刮至周橋約一萬四百餘丈。宜煩聖慮。飭河臣迅速加築。至三官廟諸口。俟其簾纜垂朽。改用石以期永久。卽現在石工。亦須加土擁護。此今日河工急務也。目今高家堰擬築小隄之處。惟令河臣每屆歲修。親勘情形題報可耳。上深以爲然。二十五

年。聖祖親征厄魯特噶爾丹。駕臨克魯倫河。噶爾丹聞風奔竄。敕大將軍伯費揚古扼要路邀戰。斬殺幾盡。噶爾丹僅以身免。時玉書從征沙漠。預參謀議。至時奉王公以下文武百僚賀表以進。行慶賀禮。三十六年六月。充平定朔漠方略正總裁官。三十九年。丁母憂。服未闋。奉詔來京。入閣辦事。時河臣張鵬翮奏河工事宜。上問玉書。奏對甚悉。乃降旨諭張鵬翮。昨問大學士張玉書。據稱河水尙大。高家堰俱爲湖水所侵。如是。則泗州盱眙安得不被水災。河身之淺深。以供澤湖水之高下爲驗。今聞洪澤湖之水。比甲子年尙高數尺。可見河身未曾刷深。恐高家堰之隄。過此以往。未可知也。四十年三月。從上南巡。四月。駐蹕蘇州府。命偕學士揆敘考試諸郡舉貢生員。閱卷呈覽。得汪泰來等五十三人。尋駐蹕江寧府。又偕揆敘等閱卷呈覽。得錢榮世等五人。及御舟次高資港。玉書奏曰。前去京江不遠。臣之敝廬在焉。苦城中無駐翠華之地。輿情雖切。未敢恭迎御輦入城。懇請行幸江天寺。多留數日。與親臨鐵甕城無異也。上乃再留一日。四十六年。河臣張鵬翮請開溜淮套河。迎上親臨相度。二月。自京起蹕。及泊清河口。往武家墩周視良久。見所樹竿之處。多屬民冢。非掘冢不能開濬。意惻然。乃召見河臣張鵬翮。斥其請開溜淮套之非。鵬翮叩頭請罪。玉書奏曰。向者老人白英。曾有引汶水分南北流之議。策之善也。不若別作壩引汶水通漕。其下流專以淮水敵黃。黃水趨海。此萬世之利也。上善其言。諭鵬翮曰。明代黃水強而淮水弱。今則淮強而黃弱矣。與其開溜淮套無益之河。曷若將洪澤湖出水之處。力行挑濬。令其寬深。使清水愈加暢流。至蔣家壩天然壩一帶。舊有河形。宜更加挑濬使通。小河不難運料。商民可以通行。漕船轉運。利亦不淺也。四十九年。玉書以疾乞休。有旨慰留。五十年五月。從上幸熱河。甫至疾作。數遣御醫調治。不能起。未及繕遺本而卒。年七十。玉書賦性仁厚。歷官五十年。爲太平宰相二十年。風度凝然。得大臣體。所作古文辭春容典雅。稱一代大手筆。嘗進講乾清宮。帝問理學之名。始於宋否。玉書奏。道理自在人心。宋儒講辨加詳耳。帝曰。日用常行無此非理。自有理學名目彼此辨論。而言行不符者甚多。若不居講學名而行事允合。此卽真理學也。及卒。帝命大學士溫達會同翰林部院官員內務府總館往弔。賜帑金千兩。經紀喪事。又遣內務府監製棺槨帳幔。沿途撥夫役護送。

至京。上親書輓章。加贈太子太保。諡文貞。五十二年二月。以子張逸少陞翰林院侍讀學士。以示眷篤舊臣之意。

靳輔

靳輔。漢軍鎮黃旗人。父應選。官通政使司參議。輔由官學生於順治九年。考授國史院編修。十五年。改內閣中書。尋遷兵部員外郎。聖祖康熙元年。遷郎中。七年。遷通政使司右通政。明年。擢國史院學士。充纂修世祖實錄副總裁官。九年十月。改內閣學士。十年六月。授安徽巡撫。十一年四月。奏臨淮靈璧二縣虛報開墾田四千六百餘頃。應請旨豁免田糧。從之。十三年。有吳三桂。耿精忠分寇江西。煽誘饒州弁兵從逆。上詔輔增兵接壤防守。輔尋遣兵會剿。擒斬歙縣賊宋鏞等。十五年二月。疏言。戶兵二部。因軍需浩繁。令裁驛站經費。臣以爲欲省經費。宜先除糜費。在外諸臣。非要務勿專差齎奏。則火牌糜費節省十之八。京差官員。酌量併減。即解餉解礮。沿途自有官兵護送。亦止需部差一員。則勘合糜費節省十之三。嚴禁各員役橫索騷擾。則節省無名之費更多。安徽所屬站額銀二十六萬兩有奇。以十分之四科之。歲省十萬餘兩。通天下計之。每歲所節省。當不下百餘萬。可以裕軍餉。甦驛困。得旨驛遞繁苦。皆由差員橫索騷擾。著嚴行飭禁。下部詳議。如所奏。定爲例。是年。疏報存留各屬橫腳等項。銀十一萬七千餘兩。節省驛站銀十二萬九千餘兩。得旨靳輔節省存留驛站各項錢糧。爲數甚多。具見實心任事。下部議敘。加兵部尚書銜。十六年八月。授河道總督。七月。疏言。黃河之水。裹沙而行。水合則流急。而沙隨水去。水分則流緩。沙停河底日高。故全賴各處清水。並力助刷。始能奔趨歸海。而無滯。歸仁一隄。原以障雖水及水涸。邱家白鹿諸湖水。不使侵淮。且令小河口白洋河入黃刷沙。自順治十六年。歸仁隄潰。淮湖諸水侵淮。不復入黃刷沙。黃水從小河口白洋河二處。逆灌積沙。漸成陸地。康熙六七年間。王家營邢家口潰。而黃水不由雲梯關入海。古溝翟家壩潰。而淮水不赴清口會黃。十五年。高家堰清水潭爛泥淺皆潰。而運道益淤。徐州以下。黃流緩弱。散漫。而河底益高矣。謹以大修事宜分列八疏。一曰。取土築隄。使河寬深。清江浦歷雲梯關至海口。河身泥淤。須於

兩旁離水三丈。各挑引河一道。面闊八丈。底闊二丈。深一丈二尺。卽以掘取之土。高築隄岸。堤底七丈。面闊三丈。高一丈二尺。則黃淮下注。中央既有舊存一二十丈。河身左右。又各有八丈。新鑿之河。所存舊隄。薄僅三丈。一經三面夾攻。自可盡行刷去。新舊之河合而爲一。河身寬至四十丈。深至二丈。可以漸復舊觀。其夫役請並令山東河南協募。二曰。開清口及爛泥淺引河。使得引淮刷黃。三曰。加築高家堰隄岸。蓋欲堵決口。不先修築殘隄。恐水將尋隙奔潰。而石工費甚浩繁。板工不能耐久。伏思水性至柔。乘風則剛。其板石諸工。率皆陡峻。故怒濤撞擊。潰卽隨之。惟遇坦坡及平漫而上。順縮而下。隄制水而不抗水。雖經大水。乘風高低。不虞激潰。今於隄外近湖之處。挑土幫築坦坡。每隄高一丈。築坦坡五丈。卽有舊存樁木。亦聽其埋於土內。以爲隄骨。夯杵堅實。密布草根草子於其上。俟其茂長。則土益堅。隄益固。四曰。周橋閘至翟家壩共三十二里。原衝支河九道及決口三十四處。須次第堵塞。臣驗各處埽工。率用柳枝蘆草。費大而不能經久。伏思剋水者土也。嘗求束土禦水之法。改埽工爲蒲包裹土。麻繩細紮而填之。則費省而工亦堅固。五曰。深挑清口至清水潭二百三十里。運道所挑之土。俱傾於東西兩隄外。卽以幫築西隄坦坡。增培東隄堅厚。六曰。合淮陽田。按上中下三則。每畝納修河銀三錢至二錢有差。商船來往淮陽兩關。納剝淺銀一年。以米石每豆二分。貨物每斤四分爲率。七曰。截南河中河北河通惠四分司。就近歸道員管理。裁管河同知山清安海宿桃三缺。改併山盱歸仁邵宿三員。以重責成。八曰。按里設兵。畫隄分守。暇則栽柳蓄草。添土幫隄。每月乘埽船下鐵掃帚刷河底淤沙。督率員弁嚴立課程。用期久遠。疏下王大臣議。以軍務未竣。大修募夫甚多。宜暫停。上命輔熟籌。輔復申前奏。唯運土用夫。請改爲車運。遂皆如所請。詔發帑興工。輔乃開通清口。爛泥淺引河四道。濬清江浦至雲梯關外河身。創築東水隄一萬八千餘丈。塞王家岡武家墩高家堰諸決口。河隄外加築縷隄及格隄。徐州宿遷築淺水壩十三座。其壩東西寬十二丈。南北長十八丈六尺。中立礮心六座。兩旁俱用石牆。土內密釘排椿。灌以漿灰。上鋪石板。聯以鐵錠。每壩一座。共成七洞。每洞各寬一丈八尺。計其洩水之地。共十二丈六尺。清水潭舊堤衝潰。輔爲棄深就淺。計築西隄九百二十餘丈。東隄六百餘丈。

更挑新河長八百四十丈。奏改名永安河。又以甘羅城西運口黃流內壩。易致停淤。自新莊閘西南挑濬至太平壩。又至文華寺挑濬至七里閘。復轉而西南。亦接至太平壩。因達爛泥淺去淮黃交會之地約十里。計閘兩月工竣。先是。漕船由駱馬湖行八十餘里始抵蘄灣。夏秋則盛漲。冬春則水涸。重運多阻。輔於湖旁疏濬阜河故道。上接伽河通運。二十年三月。以大修已越三年。黃河未盡歸故道。自請議處。部議革職。得旨留任督修。二十一年五月。上遣尙書伊桑阿侍郎宋文運等閱工。並以候補布政使崔維雅隨往。因具奏上河防芻議兩河治略二書。及條列二十四事。欲更改輔所行減水壩諸法也。十月。伊桑阿等還奏。靳輔建議大修。已用帑銀二百五十餘萬兩。今蕭家渡決口未堵。宿遷沭陽等處。田地淹沒。黃河不歸故道。其言固難盡信。崔維雅改議修築。亦未必成功。輔疏言。河工次第告竣。海口大闢。下流疏通。腹心之患已除。蕭家渡決口。堵塞亦易。不宜有所更張。因詳辨維雅陳二十四事不可行。乃召輔來京。十一月。輔至。奏蕭家渡決口。明年正月可塞。崔維雅所議挑河。每日用夫四十萬。築堤以十二丈爲準。斷不可行。上是之。二十二年四月。疏報蕭家渡工成。河歸故道。請修七里溝險汛。天妃壩王公堤等閘座。又請增開封歸德隄工。以防上流壅滯。十二月。詔復原職。二十三年十月。上南巡閱河。御書閱河隄詩賜之。二十四年正月。疏請添建黃河南岸毛城鋪減水閘一。王家山十八里屯減水閘三。北岸大谷山減水閘二。以保徐州上流隄工。並於歸仁隄添建石壩二。攔馬河及清河運口各添建石閘一。九月。疏言。勘閱河南隄岸。考城儀封陽武三縣。應幫築隄工七千八百七十九丈。封邱縣荆隆口。應築大月隄三百三十丈。滎澤縣應修築埽工二百一十丈。以防上流異漲。並請增設蘭陽儀封滎澤河員。免開封歸德二府居民採辦青柳事。下部議俱從之。是時。上念高郵寶應諸州縣湖水泛溢。民田被淹。命安徽按察使于成龍經理海口及下河事宜。仍聽輔節制。輔疏言。下河卑於海潮五尺。疏海口則引潮內侵。大不便。請自高郵城東車邏鎮築長隄二。歷興化白駒場至海口。東所洩之水入海。隄內涸出田畝。丈量還民。其餘田。招民屯墾。以抵經費。廷議如所奏。召輔及于成龍進京。成龍力主開濬海口故道。輔仍議築長隄。高一丈五尺。東水敵海潮。大學士九卿俱從輔議。通政使參議成其範。

給事中王又旦。御史錢鈺從成龍議。時寶應人侍讀喬萊。奏輔議非是。乃命尙書薩穆哈等往勘視。尋以開海口無益回奏。會江寧巡撫湯斌入爲尙書。奏下河宜疏濬。上命侍郎孫在豐往董其事。二十六年七月。詔詢下河田疇。何策可紓水患。輔疏言。宋元以前。高郵寶應諸湖。原皆田疇。臣前堵築清水潭。深挑兩隄。中間河底。有宋元舊錢。及甃井石街。其爲民居可證。蓋黃河在宋元時。雖南侵而尙未全徙。至明代始絕北流。南奪淮渠以入海。致淮水壅不得下。清河縣之洪澤村。漫淹而爲洪澤湖。又從高家堰壩家壩旁流。東注爲高郵寶應諸湖。自此永不復田疇之舊。且爲患於下河矣。臣屢經剿驗。運河隄頂。卑於高家堰隄頂一丈有奇。故減水壩之建。在隄隄可洩水一千方。在運隄。則便可洩水一千二百方。所以歷七年之久。三遭大漲而運隄安然無恙。運隄所洩之水。以下河爲壑。下河之東卽大海。濬海口似可紓水患。然自清江浦南行三百餘里。至江都縣之茱萸灣。折而東。百餘里至泰州。又百餘里至海安鎮。折而北。卽范公隄。沿隄而行。歷安豐東臺河梁丁溪白駒劉莊等場。計二百餘里。而抵鹽城縣。北行百餘里而至廟灣場。折而西。百餘里爲蘇家嘴。又百餘里仍回清江浦。計程千里有奇。惟廟灣天妃石磯三口。向係洩水入海之處。必登舟過渡。餘皆可以馳馬之路。其卑處於周圍馬路中者。南北三百餘里。東西二百餘里。形如釜底。止就釜底挑挖。徒增釜底之深。當淮流盛漲高堰。洩水洶湧而來。仍不能救民田之淹沒。臣與幕友陳潢。反復曲籌。杜患於流。不若杜患於源。高家堰之隄外直東爲下河。東北爲清口。當自翟家壩起。歷唐埂古溝周橋欄高良欄高家堰築重隄一道。約高一丈七八尺至二丈不等。長一萬六千丈。需費七十五萬五千兩。此工一成。東堰隄減下之水。使北出清口。則洪澤湖之水。不復東奔下河。其下河十餘萬頃之地。可變成沃產。而高寶諸湖。俱可涸出田畝數千頃。招人屯墾。可以裕河庫。且高堰原爲最險之工。增此隄則長年保護。洪澤湖廣闊非常。一遇風起。多覆舟沈溺。行此隄內之河。則避湖險。而就安流。有便於商民者甚大。至臣幕友陳潢。前逢聖駕閱工。臣以姓名上達宸聰。其間興工之委曲及將來竣工。非陳潢協力區畫不可。念臣垂老多病。萬一卽填溝壑。或病臥不能馳驅。則繼臣司河者。仍必得陳潢在幕佐之。庶不歧誤。此臣十年以來之血誠。欲吐而未敢者。

今據實陳明。非僅居功蔽賢之念不忍萌。即引嫌避忌之私亦不敢計。疏下廷議如所請。並賜陳潢僉事道銜。時于成龍任直隸巡撫。詔以輔疏示詢成龍。成龍言。下河宜開。重隄不宜築。上遣尙書佛倫。侍郎熊一瀾。給事中達奇納趙吉士。與總督董誥總漕慕天顏會勘。天顏在豐議與輔相左。佛倫等以應從輔議還奏。仍下九卿會議。二十七年正月。御史郭琇疏言。海宇昇平。萬邦底定。宵旰殷憂。時切如傷之念者。止一綫黃河。與淮揚等州縣昏墊之黎民耳。皇上委任河臣靳輔。靳輔則聽命於幕客陳潢。如果洪水歸洋。狂瀾永息。猶得有辭。乃今日議築隄。明日議挑濬。糜費帑金數百萬。終無底止之期。今日題河道。明日題河廳。以朝廷爵位爲私恩。從未聞有得人之效。又復搜奪民田。妄稱屯墾。取米麥越境貨賣。皇上以下河爲必可開。而靳輔百計阻撓。欲令功垂成而終止。且屯田一事。皇上洞知其累民。會勘諸臣亦知其累民。則靳輔陳潢之罪。瞭如指掌矣。陳潢爲靳輔營一家之謀。於國計民生全無裨益。忌功之念重。圖利之心堅。真國之蠹而民之讐也。監司僉事何等尊貴。豈容一介小人。冒濫名器。以快靳輔酬報私情。宜卽斥革。敕部嚴加處分。另簡大臣之清廉敏練者。整理河務。庶成功可奏。生靈永利矣。疏下九卿查議。二月。給事中劉楷疏言。河工道廳至雜職百十餘員。題補之權。總歸河臣。使其虛己求才。果能奏安瀾之效。猶且不可久擅。用人大權。乃在於保舉。及至任事。漫無寸功。惟見每歲報衝決而已。嗣後大小河官。應仍由吏部選補。御史陸祖修疏言。皇上每遇緊要政事。令九卿會議。期於衆論僉同。至當不易。無奈河臣靳輔。身雖在外而呼吸甚靈。九卿中贊決異同者。不過三四人。皆左袒河臣。不顧公議。如屯田一事。悉依戶部尙書佛倫等所奏具稿。籍衆人之口。伏思民間地畝。各處例有准則起科。並無額外多餘之理。直隸巡撫于成龍。審事糊塗。將還。倘蒙親詢其間利病根由。情弊始末。可救東南七州縣昏墊之民命。省內府幾百萬糜費之金錢。河臣積惡已盈。中外人心。總望睿斷罷斥。萬勿議勞使過以重遷回。昔帝舜殛殛鯀。以其逆水之性也。今兼有屯田害民之事。去一靳輔。天下萬世。仰賴聖明無踰此矣。時慕天顏孫在豐亦疏論屯田累民及輔阻撓下河開濬事。詔俟于成龍至會議。一併嚴察。輔尋得請入覲。先疏論于成龍慕天顏孫在豐朋謀陷害。又自辯受命治河之日。正當兩河

壞極之時。自碭山以抵海口南北兩岸。決口七八十處。高家堰決口三十四處。翟家壩成河九道。清水潭久潰下河。七州縣一望汪洋。清口運河變爲陸地。臣晝夜奔馳。先堵高家堰。淮水方出清口。旋堵清水潭。挑挖運河。改移運口。迄今永遠深通。其向來行運之駱馬湖。淤淺不能行舟。臣創開阜河。漕艘無阻。久蒙聖鑒。至濬築經費。方臣未任之初。曾特遣部臣勘估計六百萬兩。臣任事後。苦心節省。自徐州起直抵海口兩岸隄工。並高家堰清水潭及前所未估之新開阜河。堵塞楊家莊。修築歸仁隄。改移運口。止用帑二百五十一萬兩。又蕭家渡衝決時。蒙賜帑一百二十萬兩。今一概加修竣工。統計所用僅及前此部臣估計之半。而臺臣郭琇。則曰糜費帑數數百萬。營一家之計。不知何所見而誣臣至此極也。其曰題道廳未聞得人。則河員原因慎重河務。必由河臣保題。定例已久。非自臣始。其曰奪田屯墾。則臣絕不以納糧之民田分釐入屯。其曰越境賣麥。則臣原以變價還部題明。其曰陳潢小人。冒濫名器。則陳潢之蒙恩。實出鼓勵人才之特典。以言冒濫。臣不知何所指。且詆之爲小人。則因于成龍久與結拜弟兄。慕天顏頻與宴好殷勤。孫在豐亦與親密異常者也。自康熙二十二年。兩河歸故運道通行。而郭琇必以洪水狂瀾罪臣。科臣劉楷曰。惟見每歲報衝決。臺臣陸祖修曰。逆水之性。又謂清丈隱占。非額外多餘地畝。蓋郭琇與孫在豐爲庚戌科同年。陸祖修爲諸生時拜慕天顏爲師。又係孫在豐教習門生。劉楷陸祖修已未科同年。並江南人與隱占田畝者。無非桑梓親戚年誼之契。故彼呼此應。協力陷臣。慕天顏與孫在豐結婚姻。因于成龍倡開海口之議。故必欲附成龍以攻臣而助在豐。兼奪臣任。夫河臣之職。與督撫不同。督撫統攝地方諸務。稍一興利除弊。易以見德。河臣頻年奔走河濱。以挑築爲務。上費帑金。下役民力。最易招尤致謗。而臣之負謗。更因屯田之清丈隱占。隱占田畝。唯山陽最多。有京田時田之分。時田一畝納一畝之糧。係小民之業。京田四畝納一畝之糧。皆勢豪之業。臣清丈流陽海州宿遷桃源清河五屬。得三百萬畝。至山陽則終不能丈。以山陽鄉紳多也。臣不顧衆怒。致讎謗沸騰。使中傷臣者。更得以借口。然臣任事十餘年。凡雇夫挑築買辦物料皆給發現銀。雖淮陽各屬。隱占田畝諸人怨臣至深者。亦不能指摘也。伏念河工一事。成之甚難。壞之甚易。自康熙六年兩

河潰決。歷經數河臣治之。十餘年終無一效。臣受任之初。羣議蜂起。百計阻撓。賴皇上不惜帑金。兼授方略。兩河得以復故。正須綢繆善後。而諸臣合計交攻。必欲陷臣殺臣而後已。全不顧運道民生大計。當此衆口鑠金之際。即皇上欲終始保全。無如諸臣朋謀陷網之密布。倘蒙聖駕再巡親閱隄工。更命重臣清丈隱占地畝。則臣與諸臣之是非功罪立分。臣身負重劾。萬死一生。幸得入覲。恐天威咫尺。不得盡吐所欲陳。謹繕疏密奏。疏入。上諭閣臣曰。近因靳輔被劾。議論其過者甚多。靳輔若不陳辯。朕前復何所控告耶。此疏並下九卿察議。三月。上御乾清門。命輔與于成龍郭琇各陳所見。于成龍言海口必應開濬。郭琇言屯田奪民產業。上曰。屯田之事。因取民餘田。小民實皆嗟怨。靳輔當亦無可置辯。輔奏。向者河旁田畝。盡被水淹。臣任事後。將決口堵閉。兩岸築隄。河流故道。無有衝決之患。數年水淹之田。盡皆涸出。臣以民間原納租稅之額田。給與本主。其餘丈出之田。作爲屯田。抵補河工所用錢糧。因屬吏奉行不善。民怨是實。臣無可辯。唯候處分。上曰。各省民田。未有不濫於納糧之額者。若以餘田作屯。豈不大擾民乎。屯田不行。無可復議。至下河作何開濬。重隄應否停築。九卿等公同詳酌確議。尋允九卿議。停築重隄。革輔職。以福建總督王新命代之。陳潢革食事道銜。初漕船出清口入黃河。行二百里始抵張莊運口。輔奏於清河縣西仲家莊建閘。上自宿遷桃源清河三縣。黃河北岸遙望。二隄內加挑中河一道。俾漕船既出清口。截流徑渡北岸。避黃河一百八十里之險陷。由仲家莊閘內進中河。歷卓河伽河北上。及工竣。學士開音布侍衛馬武往勘還奏。中河商賈舟行不絕。漕運可通。上諭廷臣曰。前于成龍奏云。靳輔開中河無益。反爲民累。河道已大壞。今開音布等往勘。則云數年以來。河道未嘗衝決。漕艘亦未有誤。謂靳輔治河全無裨益。微獨靳輔不服。朕亦不愜於心矣。若王新命順從于成龍之說。將原修工程盡行更改。是各懷私忿。必致貽誤河工。乃命尙書張玉書圖納等往勘。確議還奏。河身漸次刷深。黃水迅溜入海。其已建閘壩隄埝及已濬引河。並應如輔所定章程。無庸更改。十一月。輔奉命同工部尙書蘇赫等。往閱通州運河。請於沙河建閘蓄水。通州下流築隄束水。以利漕運。從之。二十八年正月。上南巡閱河。輔從行。論詢中傳逼近黃河。水漲隄潰可虞。輔奏前曾奉諭。籌調馬河

減水壩所出之水。每致淹沒民田。臣開中河以東水。兼令漕船避黃河險隘。今若加築遙隄。曾不至有患。三月。官復原品。二十九年三月。漕運總督董訥。以北運河水淺。請盡洩南旺湖之水。北流倉場。侍郎開音布以挑堵北運河。奏請上召問輔。輔奏曰。旺湖水若使偏入北河。必致南河水淺。唯從北河兩旁下埽束水。則水深自可濟運。詔即以輔同開音布經理之。三十年九月。奉命與侍郎博學。李光地等開黃河險工。三十一年正月。還奏黃河南岸。自徐州以上毛城鋪起。至海口北岸。自大谷山起。至豐梯關以下六套。所有減水壩開。現無衝損。中河亦甚便漕船往來。唯黃河南岸之橫莊煙墩馬遷。北岸之朱家莊安東縣便益門南東門大處險工。有未設月隄。及下埽單薄處。應增築加培。並繪圖呈覽。下九卿議。令河臣如所奏行。二月。王新命以勒取庫銀爲運河同知陳良謨。許罷上諭大學士曰。朕聽政以來。以三藩及河務漕運爲三大事。夙夜廬念。曾書而懸之宮中柱上。至今尙存。倘河務不得其人。一時漕運有礙。關係非輕。靳輔熟練河務。及其未甚老而用之。亦得紓數年之慮。令其仍爲河道總督。輔以衰病辭。命順天府丞徐廷璽同往協理。六月。疏言。前所奉詔。截留江北漕糧二十萬石。由黃河運至山西蒲州。接陝西賑濟。臣因開封以西黃河。淺深無定。與漕臣董訥定議。漕船三百八十四。每船預支下運行月銀六十兩。爲增雇剝船夫役之用。共銀二萬三千四十兩。二月初至淮安開行。臣於五月初赴開封。督飭催僱。添雇民船。隨淺隨剝。撫臣閻興邦牒稱水路止可運至孟津。由孟津陸運至蒲州六百三十里。業經山陝兩省議明分運。臣今赴孟津料理。十月。疏言。黃河自河南滎澤縣至江南清河縣兩岸。各一千餘里。其險工不可疏虞。如南岸之在開封。或疏虞。則黃水入淮。歸德至宿遷。或疏虞。則黃水入睢。桃源清河間。或疏虞。則黃水入洪澤湖。以侵高堰。倘高堰不固。竇應高郵運道。必致淤墊。故尙須籌畫萬全。欲加築前此停築之重隄。爲費甚大。惟就運料小河之隄。加築高二丈廣三丈。乃可無患。北岸之在滎澤。或疏虞。則黃河水上溢張秋。下溢濟寧魚臺豐沛。民田受淹。宿遷清河。或疏虞。則一百八十里之運道亦淤墊。故中河遙隄。必須加築。於西寧橋添建石閘二。仲家莊陶家莊兩閘左右。各添一閘。以備宣洩。其張莊舊運口。臣輔前挑中河時。曾議設閘。因解任未舉行。恐將來山東之水微弱。致

中河淺澀。今宜竟行堵塞。就駱馬湖之東。中河之南建閘。值東水大漲。開以洩之。東水消落。閉以蓄之。庶無他慮。又疏言。黃河隄工。莫重於既成之後。隨時修補。隄根積水。易致汕刷。惟於上流量挖一溝。引沙直注使停。再於下流量挖一溝。引水分洩漸去。其低窪處自然淤平。巨輔前任時。相度董家堂龍窩二處險工。曾設涵洞。引黃灌注於月隄裏。使清水流在月隄外。窪地遂成平陸。徐州長樊大壩險工。亦引黃內灌。淤高窪地二三尺。今邳州舊城迤西。窪地周圍約有百里。水無去路。宜仿已驗之法行之。或慮掘隄。難以修防。則建小閘以酌量引灌。更爲萬全。疏下。九卿議以黃河水勢湍迅。引灌邳州窪地。已屬危險。令再審籌。餘如所請。又疏言。臣前任安徽巡撫。當軍興之際。陳潢助理協宜。及任總河。值高家堰決口甚多。翟家壩未堵二十餘里。成河九道。因盡行築隄。塞河以敵清口之黃。創設減水壩以保高堰之隄。政清水潭隄工於湖內。永保安瀾。濬甘羅城運口至太平壩。以避黃水內灌。挑阜河二十餘里。支河三十里。使駱馬湖不復淤墊。又挑中河。使漕船免黃河逆流之險。凡臣所經營。皆潢之計。議仰荷聖主。如天之福。次第成功。恩賜潢僉事道銜。不意驟遭詆毀。革去職銜。旋即物故。又奉命勘河之尙書熊一瀾。給事中達奇納趙吉士。同時被指摘而去。已蒙恩起復。則無辜受累者。當一體均邀慈鑒。疏下吏部。陳潢已故。寢議。熊一瀾達奇納趙吉士並請旨錄用。時輔再疏。自陳疾劇。乞解任。命內大臣明珠往視。傳諭留淮調理。十一月卒於官。年六十。賜祭葬如例。諡曰文襄。三十五年。河道總督董安國以江南士民。籲請捐資建祠。河干入奏。下部議行。四十六年。加贈太子太保。予騎都尉世職。尋令其子治豫襲職。准再襲二次。世宗雍正三年。以治豫向隨父任。明晰河務。由副參領加工部侍郎銜。協理江南河工事務。五年。復追贈工部尙書。予祭一次。七年。命江蘇巡撫尹繼善。擇地建祠祀輔。春秋致祭。八年。詔建賢良祠於京師。以輔入祀。

陳鵬年

陳鵬年。字北溟。別字滄洲。湖廣湘潭人。康熙三十年。進士。初任浙江西安知縣。四十年。河道總督張鵬翔薦其才。

欽敘練堪理河務。調赴江南河工。四十一年。授山陽縣知縣。遷海州知州。四十二年。聖祖南巡。過沂州。詔截漕四萬石。令張鵬翮選賢員運充州分賑。以鵬年董其事。四十三年。擢江寧知府。四十四年六月。兩江總督阿山疏劾鵬年收鹽店當舖年規。侵欺龍江關稅銀。無故捉拏關役。重責枷號各款。又以甫經驅逐窩娼之南市樓基址。改造鄉約講堂。寫列聖諭十六條。中懸天語丁寧四字扁額。不敬莫大。事下總督桑額總河張鵬翮會同阿山定讞論斬。得旨革職。從寬免死來京。在修書處效力。四十七年九月。特授蘇州知府。四十八年十一月。江蘇布政使宜思恭爲總督噶禮劾罷。詔以鵬年署布政使。四十九年。噶禮續劾宜思恭虧帑。又劾糧道賈樸侵蝕建關開河銀項。並坐鵬年覈報不實。部議革任。發往黑龍江。仍得旨來京修書。五十一年十月。吏部議噶禮與巡撫張伯行互訐事。擬革伯行職。上以張伯行居官清廉。下九卿政議。並諭曰。陳鵬年稍有聲譽。學問亦優。張伯行聽信其言。是以噶禮欲害之。曾奏其虎邱詩中有悖謬語。朕閱其詩。並無干礙。朕纂輯羣書甚多。詩中所用典故。朕皆知之。卽末句鷗盟二字。不過託意漁樵。陳鵬年詩見在。今與爾等公看。五十六年。出署霸昌道。既受代。仍回京修書。六十年四月。命隨尚書張鵬翮勘閩山東河南運河。九月。河道總督趙世顯奏令往視河南武陟縣釘船幫決口。十月。鵬年疏言。黃河老隄衝開八九里。見今大溜直趨決口。應於對岸上流廣武山淤灘。另開引河。使溜南趨。再於決口稍東。逢灣取直。亦開一引河。引溜東行。仍歸正河。方可漸次堵築。得旨朕每留心河務。黃河衝決之處。一經奏聞。卽詳晰指示。今覽陳鵬年所奏。皆與朕前頒諭旨相合。下部知之。十一月。趙世顯薦屬員訐罷。詔鵬年署河道總督。十二月。奏言。近年淮安權關。以河工同知管理捐納銀項。令准徐道貯庫應用。並歸總河稽覈。臣思河工同知職在修防。道臣總理工程。皆難兼顧。臣則馳驅河干之日多。既不暇清理。恐付託非人。請另遣部員管淮安關。而以捐納事例歸江蘇巡撫稽覈貯銀藩庫。俾臣得董率屬員。專力河務。疏下部議。如所請行。六十一年二月。奏言。河南滎澤縣黃河兩岸隄工。止出水面三四尺五六寸不等。一遇水漲。卽漫隄而過。上流水既漫散。則下流河身日漸淤高。隄岸卑矮。且有殘缺。難資捍禦。宜於挑濬以前。增高培厚。疏下部議。令河南巡撫楊宗義速行修築。